

Date –06/10/2023

Time - 18:30Hrs

## REGIONAL NEWS BULLETIN

### HEADLINES (EVENING)

- Art& Culture Minister Pu R Lalzirliana'n vawiin khan Saitual Deputy Commissioner Office a hawng.
- Lunglei Science Centre & Digital Planetarium, Zohnuai ami chu MYC Chairman Dr.Vanlaltanpuian vawiin khan a hawng.
- Right To Information Week chu District hrang hrangah hman tan a ni.
- Lok Sabha MP Pu C.Lalrosangan SAGY hnuai a Model Village thlan Muthi chu vawiin khan tlawhin internet chak zawk an neih theih nan Bharat Net a hawng.



### SAITUAL DC OFFICE

Art& Culture Minister Pu R Lalzirliana'n vawiin khan Saitual Deputy Commissioner Office a hawng a,

Hawna thusawiin Pu Lalzirliana chuan Saitual DC office building thar hawn chu amah mimal ngei pawhin hun rei tawh tak District din anih theih nan a theihtawp a lo chhuah tawh leh vahvaih pui tawh a nih avangin a thinlung chhungril tak in a lawm a ni, a ti a. Saitual chu District capital ni mai lova khawpui lian a nih theih nan kawng hrang hrang in a hun chung in hmalakna kalpui a ni, a ti . Saichal kawng laih a nih avangin awlsam takin kawlkulh kaltlang ngailo in khaw tamtak atangin Saitual chu kalpawh theih a ni ta a, tui pawh hnianghniar taka a awm theih nan Tuivawl atangin pump chhoh a ni, a ti.

Saitual DC Dr Lalgura Tlau pawh in thu sawiin, DC office building hawn anih theih nan a sawrkar leh mimal ang pawh a tha leh ngaihtuahna lo seng tawh zawng zawng te chungah a lawmthu a sawi a. DC office chu Saitual mipui te tan a ni tih hria a, neitu thinlung pu a en turin a chah bawk a ni.

Saitual DC office building hawna ah hian DC lo ni tawh thin Pu C Lalpeksanga leh Pu V. L Hruaizela Khiangte leh midang ten thu sawiin, Saitual a Department hrang hrang a thawktu te leh sawm bik mi pawimawh te an tel a ni.



### RD MINISTER

Rural Development Minister Pu Lalruatkima'n vawiin khan Mizoram State Rural Livelihoods Mission (MzSRLM) in Self Help Group ten an thilsiam phochhuahna leh zawrhna hmun Aizawla SHG Mart Lianchhairi Run Building Ground Floor a buatsaih thar a hawng.

Pu Lalruatkima chuan MzSRLM chu kum 10 chauh upa ni mahse thingtlang mite dinmun chawikanna kawngah leh eizawna kawng kawhhmuh leh siamsak kawngah te Self Help Group kaltlanga nasa tak an thawhna chuan rah tha duhawm tak a chhuah mek thusawiin hei hian Mizoram ei leh bar dinmun leh

kuthathawktute leh kuthemthiamte sum lakluh a tipung a ni, a ti. SHG avanga mimal hlawhtling chanchin thenkhat sawiin Minister chuan MzSRLM hian eizawna kawng lamah chauh thingtlang a chengte hi hma kalpui lovin sum leh pai enkawl leh vawn te an zirtir baw k a, hei hian nasa takin an mahni a chona siamin ngaihtuah thar a pe a, chu chuan an mahni a tumruhna leh taimakna te tuhin an hlawhtling ta a ni, a ti.

Mizoram pumah hian Self Help Group 10708 an awm mek a, heng member zat hi mi sing 8 & 4169 an awm mek a. An chungah hian an mahni khaihawmtu Village Organization 735 leh Cluster Level Federation 52 a awm mek baw k a ni.



## LUNGLEI

Lunglei Science Centre & Digital Planetarium, Zohnuai ami chu Mizoram Youth Commission Chairman Dr.Vanlaltanpuia, MLA chuan vawiin khan a hawng.

Dr.Vanlaltanpuia chuan Mizoram Youth Commission chuan Mizoram-a Science Centre pahnihna tur Lunglei Science Centre & Digital Planetarium peihfel a ni ta chu Lunglei District tana ni chhinchhiah tlak leh thil pawimawh tak a ni a ti a, Mizoram chhim lam zirlai naupangte tan science zirna puitu hmun pawimawh tak leh mipui vantlangte tan pawh science hriatchianna kawng hmasawna thlen tir tur a nih a beisei thu a sawi a. India ram state dangte bakah ramdangte hmasawna ke pen ruala pen ve turin Lunglei leh a chhehvel District-te a duhsak thu a sawi a ni.

Lunglei Science Centre hi cheng nuai 697 senga Mizoram sawrkarin a din a ni a. Digital Planetarium hi Dte. of Science & Technology hnuai a awm Mizoram Science, Technology & Innovation Council (MISTIC) hmalakna a cheng nuai 330 senga din niin, North Eastern Council atangin sum hmuh a ni.

Lunglei Science Centre & Digital Planetarium hawna programme hi Lunglei a sawrkar mi pawimawh tak takte leh zirna in hrang hranga hotu leh thawktuten an hmanpui a. MUP, MHIP, YMA, Kohran aiawhte leh chanchinbumiten an hmanpui baw k a ni.



## SOCIAL WELFARE MINISTER

Social Welfare Minister Pu Lalrinawma, Tuikum Bialtu MLA ni baw k chuan Chhuanthar Tlangnuam Panchayat Bhawan leh Baktawng Government P/S -I Building thar a hawng a. Chhuanthar School Lumpsump GIA a hlankai lawmna hun a hmanpui baw k.

Pu Lalrinawma chuan amah ngei pawh a lo kal tawhna school ngei hawng theia a awm chu lawmawm tiin hriatreng tlak a tih thu a sawi a. Bial a vil leh enkawl zuina kawngah eizawna, zirna leh hriselna te chu a ngaih pawimawh zual a nih thu sawiin, bial leh khawtlang hmasawna hnathawh leh hmalaknaah thawh hona tha an neih thin avangin bial mipuite chungah lawmthu a sawi a ni.

Chhuanthar Tlangnuam VCP Pu Lalramzaua'n kalkhawmte lawmna thu sawiin, bialtu MLA hmalaknaah lawmthu a sawi a. Serchhip District LAD hnuai a Panchayat Bhawan (RGSA 2020-2021) thar leh khawtlanga mi tam zawk eizawna nen a inzawm tlat Tranformer thar an nei thei chu lawmawm a tih thu a sawi baw k a. P/S-I Lumpsump GIA a hlankai a ni chu lawmawm a tih thu sawiin bialtu MLA leh Sawrkar hmalakna-ah mipui aiawh pawhin lawmthu a sawi baw k a ni.



## RD MINISTER

Rural Development Minister Pu Lalruatkima'n Aizawl MINECO-a a Office Chamber atangin internet kaltlangin Tipa RD Block, BDO Office sak thar leh District Rural Development Organization (DRDO) Project Director Siaha leh Khawzawl te chenna tur Quarter sak thar te a hawng.

Pu Lalruatkima chuan he hunah hian state hrang hrang RD Department te hnathawh tehna pakhat ah RD Department Mizoram chuan dinhmun 2 na a luah thu tarlangin, Ministry lamin thlirletna meeting an koha state dangte an hauh lainn Mizoram chuan fak a hlawh a, MGNREGS hlawhtlinna te a hmuna zir turin Puducherry RD Minister hialin Mizoram a rawn tlawh a ni, a ti.

Department hnuai scheme hrang hrang hnathawh leh hlawhtlinna te tarlangin kum 5 chhungin kumtin ni 100 inhlawhna MGNREGS chu ni za ang zel in kalpui a ni a, hei hi a hlawhtlinna ropui tak a ni a, kumin Sawrkar kum kal lai mekah pawh hei hi tih hlawhtlin tumin hma mek a ni, a ti. Rurban Mission hnuai hmalakna SPRM ah India rama cluster 300 zinga Aibawk Cluster chu hna zo fel hmasa ber a nih thu te, MzSRLM hnuai thalai training chhuak te chu rampawn thlengin an thawk mek thu te, SHG kaltlangin thingtlang miten eizawna kawng an hlawhtlinpui dante leh PMSKY ah project 18 phalsak an nih thu te pawh a sawilang bawk a ni.

BDO Office, Tipa RD Bloch hi concrete building chawng 3 a sak niin a sak nan cheng nuai 182.94 sen a ni a. PD Quarter Siaha pawh hi concrete building chawng 3 a sak niin a sak nan cheng nuai 142.30 sen a ni a. PD Quarter Khawzawl pawh concrete building chawng 4 a sak niin a sak nan cheng nuai 157 sen a ni.

<><><>

## RTI WEEK

Right To Information RTI Week chu District hrang hrangah hman tan a ni a,

Vawiin khan Serchhip District ah RTI Week pual hian Serchhip DC Pu David Lalthantluanga hovin hun hman a ni a, Pu David Lalthantluanga chuan RTI Act hman a nih atangin kum 18 a liam ta a, chu Act chu khawtlangah inchiahin mihring te khawsak phung leh hmasawna a zir zelin Dan pawh her rem leh tihphuisui chhoh chhunzawm zel a ni, a ti a. Tunah chuan Sawrkar Department leh PSU te chauh ni lo, Village Council thleng pawhin a huam tawh a ni, a ti.

RTI Week hi tun thla ni 5 atanga ni 12 chhungin India ram pumah hman a ni a. A lawmna pui ber chu Aizawlah neih niin District Headquarters tinah he hapta chhung hian RTI Act pualin hun an hmang vek dawn a ni.

Mamit-ah chuan Right to Information (RTI) Week, hawna hun hi vawiin khan DC V.L Remliana hovin neih a ni a, Pu V.L Remliana chuan RTI hmang tangkai turin a nihna tak chian a tul a, a bu leh kaihruainate chhiar chiana hriat zau a tul a ni a ti. RTI Act duanchhuah a nih hnuah langtlang sawrkar siamna kawngah a tangkai hle a, sawrkar kaltlanga hmasawna hnathawhte chiang tak leh felfai taka vawnthat vek a nih thu a sawi.

Kalkhawmte atangin zawhna leh chhan hun hman a ni a. Zawhnate hi Pu B. Lalpuia, District Resource Person & Head Faculty, SIRD chuan a chhang a ni.

Hnahthialah vawiin khan DC Conference Hall, Rallang Tlangah District Bawrsap Pu Chuahhuna hovin RTI Week hman a ni a, Addl. Deputy Commissioner Pu Lalvenhima chuan he hun hi a kaihruai a ni.

Hnahthial District huamchhunga SPIO/SAPIO te, VC aiawhte, NGO aiawhte, College zirlai aiawhte leh chanchinbumite an tel a ni.

<><><>

LS MP

Lok Sabha MP Pu C.Lalrosangan Saansad Adarsh Gram Yojana (SAGY) Phase VII hnuai Model Village atana a thlan Muthi chu vawiin khan tlawhin hmalaknate a enfiah a, internet chak zawk an neih theih nan Bharat Net a hawng nghal bawk.

Pu C.Lalrosanga chuan Muthi Model Village-a Line department hrang hrangte hmalakna atanga hlawhtlinna hmuh a ni chho zel leh ruahmanna awmsa atanga zaa 80 zawhfel a ni chu lawmawm a tih thu a sawi a. Nodal Officer Aizawl DC, Charge Officer & BDO Tlangnuam, Line Department leh khawtlang mipuite thawhhona ropui a tih thu sawiin, SAGY chu India ram thingtlangte tihmasawn nana Prime Minister ruahman scheme ngaihpaawimawh tak a ni, a ti a. India rama SAGY Model Village 3,341 zinga.Muthi a tel chu khawtlang tana malsawmna a nih thu a sawi a. Hemi atana hmalakna tur Village Development Plan duante chak taka bawhzui a ni chu lawmawm a tih thu a sawi bawk.

Sawrkar laipui scheme-te tangkai taka hman a nih thin thu sawiin, Mizoram chu a chhawr tangkai berte zinga mi a ni, a ti a. Optical fibre hmanga internet chak zawk pekna tur chu zirlai puitu mai bakah a tangkai thei ang bera hman a nih ngei a beisei thu a sawi a. Hemi kawnga hmalatu BSNL leh Telecommunication lama thawktute chungah lawmthu a sawi bawk.

He hun hi Muthi VCP Pu Kaphmingthanga chuan kaihruiin hmalakna hrang hrangte ngaihthlak a ni.

Muthi khua hi July ni 21, 2020 khan Lok Sabha MP Pu C.Lalrosanga chuan SAGY Model Village atan a thlang a. SAGY Phase VII kaltlangin MP leh MLA Fund bakah line department hrang hrangte kaltlangin khawtlang mamawhte chhawpchuah a ni a. Village Development Plan (VDP) project 41 kalpui tura ruahman zingah 33 zawh tawh niin, project kal mek 3 bakah la thawh tur 5 a awm mek bawk a ni.

<><><>